

Misiliilluni aningaasaliineq nunaqarfinni qerititsivinnik sanaartornissamik annertusaanissamullu tapiisarnerni periutsit pissutsillu pitsaanerpaat anguniarlugit qanoq aaqqiivigineqarsinnaanera pillugit Inatsisartut Naalackersuisut nassuiaasioqqullugit peqquneqarnissaannik aalajangiiffigisassatut siunnersuut. Nassuiaasiornermi isumalluutit suliffissaqartitsinerit kiisalu aningaasaqarnermut tunngasut kommunit, inuussutissarsiornermik ingerlatsisut aammalu KANUNUPE-p misilittagaat ilaatigut ilanngunneqassapput. Nassuiaat Inatsisartunut agguanneqassaaq, tamatumani nassuiaatip inerniliineri AIS20-imut ilanngullugit suliarineqarsinnaalerlugit.

(Inatsisartunut ilaasortaq Peter Olsen, Inuit Ataqatigiit)

Akissuteqaat

(Inuussutissarsiornermut Nukissiuuteqarnermullu Naalackersuisoq)

Aappassaanneerpeqarnera

Naalackersuisut sinnerlugit Inuussutissarsiornermut Aatsitassanullu Ataatsimiititaliaq sukumiisumik suliarinninneranut qutsavigaara.

Aalisarnermut suliassaqarfik inuussutissarsiornermi pingaaruteqartorujussuuvoq. Inuussutissarsiortut pitsaanerpaamik periarfissaqarnissaasa qulakkeernissaat pingaaruteqartorujussuuvoq. Taamaattumik Kalaallit Nunaat tamakkerlugu inuussutissarsiortunut atugassatut toqqammaviusut pitsanngorsarneqarnissaat Naalackersuisut suli sulissutiginiarpaat kiisalu nunaqarfinni isorliunerusunilu inuussutissarsiornermi atugassarititaasut pitsanngorsarneqarnissaat aallutissallugit.

Siusinnerusukkut paasissutissiissutigineqareersutut, nukissiamik imermillu pilersuineq pillugu suleqatigiinnerulersitsiniarluni, Inuussutissarsiornermut Nukissiuuteqarnermullu Naalackersuisoqarfik Nukissiorfiit peqatigalugu ukiup matuma aallartisimalernerani aalisarnermi suliaqartunut pilersuineq pillugu isumasioqatigiissitsivoq. Pilersaarutigineqarpoq aalisarnermi suliaqartunik suli allanik ataatsimiinnernik ingerlatsisoqassasoq.

Nunaqarfinni isorliunerusunilu inuussutissarsiornermi suliffeqarnermilu suliniutinut tunisassiorfiit ingerlanneqarnerannut atugassanik aningaasanut inatsimmi tapersiisoqartarpoq. Inuussutissarsiornerup siuarsarneqarnissaannut aqqissuussinert arlallit, namminersorlutik aallarnisaasartunut atugassiissutigineqartut, Greenland Business-ip Naalackersuisut sinnerlugit isumagisarai. Inuussutissarsiornerup siuarsarneqarnissaanut aqqissuussinernit taakkunannga tunisassianik ineriartortitsinissamut, avammut nioqquteqarnermut tapersiissutitut, inuussutissarsiutigalugu siunnersortinit ikiorneqarnissanut tapersiissutitut, kalaallit nerisassiaannut, takornariartitsinerimut il.il. aningaasaliisoqarsinnaavoq.

Nunaqarfinni isorliunerusunilu inuussutissarsiornerup ineriartortinneqarnerata nukittorsarnissaata sulissutigineqarnera taanna, Naalakkersuisut aamma siunissami ingerlatiinnassavaat.

Naalakkersuisut taamatut oqaaseqarlutik Inuussutissarsiornermut Aatsitassanullu Ataatsimiititaliap isumaliutissiissutaa tusaatissatut tiguaat.